

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA SETEMA 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

MALUMALU EFKS PETANIA FOU, FALEATA



Asotasi Time FT, Enefatu Lesa FT (Taitaifono Fono Tele), Iosefa Afutiti FT (Taitai Sauniga), Misipalauni Faatau FT, Enoka Pouniu FS, & Mataia Apisaloma TT Faleata @ EFKS Petania Fou, Toamua uta, MTG FALEATA.

O LE FAASINO UPU

1. O LE LAUGA	2
2. MALUMALU EFKS PETANIA FOU	4
3. O LAU AFIOGA O LE SULU	5
4. PEPA MAFUTAGA FAAFOUINA	6
5. O LE PEROFETA MULIMULI	8
6. ATA O MATAUPU LOMIA	16

O LE LAUGA

Tusi Faitau (Aso Sa, 28 Setema 2025): Kenese 12: 1 – 3, 10 – 20.

Matua: Kenese 12:1, *“Ua fetalai mai le Alii ia Aperamo, Ia tuua e oe o lou nuu, ma tagata o lou nuu, ma le aiga o lou tamā, a e alu atu i se nuu ou te faasino atu ai ia te oe.”*

Manatu Autu: Faatuatua – Malaga i le mea e lē iloa (Faith – journeys into the unknown)

O le tulaga a ia ua mautinoa ma silafia e le au faatuatua, o le mea e gata ai le iloa faaletagata, o iina e matuā atoatoa ai le silafia o le Atua soifua. Peitai o le malaga a le tagata kerisiano o le tagata foi ua talitonu i le Atua faatonu mai, o lona faatuatua mauaa, e mafai ai ona ia iloa ma malamalama, ona usitai ai lea i mea uma e fetalai mai ai le Atua.

E ese le taua i le soifuaga ma le olaga o le tagata faatuatua le upu leni o le usitai. A o le fesili, O le a le uiga o le upu, ‘usitai’? O le usitai, o le taliaina lea po o le faatino o se faatonuga e aunoa ma se fesili ina ia faamalieina lē o loo faia le faatonuga.

E tali foliga faapena le lagona o loo aumaia i le tala o loo faamauina e le Tusi o Kenese 12. Le tala i le toeaia o Aperamo le atalii o Tara lea na faatonuina e le Atua e alu ese mai lona aiga. Aisea? Auā foi o loo i ai se faamoemoe ma se fuafuaga tuutuu mamao a le Atua e ao ona faatino ma faataunuu e ala ia Aperamo. Peitai, e le mafai ona taunuu lea faamoemoe pe afai e nofo pea Aperamo i Karana. O Karana o le tasi lea o aai o loo fai ma ogatotonugalemu o nisi o tapuaiga faapaupau. O Tara la le tamā o Aperamo ma lona aiga, o nisi ia o

tagata e fiafia e ifo ma tapuai i Tapuaiga faapaupau ia ma o latou atua eseese. O lona uiga la, e lē o se mea e taumateina le ifoifo ai foi ma le tamā o Aperamo i le tapuaiga lea. E manino lelei lava la le faatonuga a le Atua ia Aperamo. O le finagalo o le Atua i le fuaiupu ua fai ma tatou matua, *“Ia tuua e oe o lou nuu, ma tagata o lou nuu, ma le aiga o lou tamā, a e alu atu i se nuu ou te faasino atu ai ia te oe.”*

Ua leva ona tautua Aperamo i lona tamā o Tara, i le faaiuga o le mataupu 11 na faailoa mai ai le oti o Tara; o lona uiga la, o lea ua seei ifo Aperamo e fai ma ta’ita’i i le aiga, auā o ia le ulumatua o le fanau e tusa ma tu ma aga. O le pule i le aiga, e pulea laueleele, e pulea manu, o fale ma meatotino uma a le aiga, o le tau i le tautua. A o lea e le’i i ai lava se taimi na saofai ai i le suamalie o le pule, a e fai mai le Atua, e tuu mea uma a e alu, alu i le mea a faasino atu ia te oe, alu e aunoa ma le iloa o le mea o le a alu i ai.

Lea ua maua mea uma, a e fai mai e alu i le mea e lē iloa. Ua 75 foi tausaga o Aperamo, ua faatūtūgatā pe a fua foi i nei tausaga e tele, a e fai mai na tu i luga ma usitai e pei ona fetalai mai le Atua. Ia ai o le afuaga foi lea o loo tali ai le fanau Aoga Aso Sa, pe a oo ina fesili pea faiaoga, O ai le tamā o le au faatuatua? O Aperamo. Ai lava na manatu Aperamo, o le a matua faasaga e tali le matagofie o fua o galuega sa fita i tuga i ai. Ai foi lava na manatu ua lava lea, e leai se isi mea e toe faia na o le ola fiafia.

Peitai na matua te’i Aperamo ina ua fetalai mai le Atua, *“Ia e tuua e oe o lou nuu, ma tagata o lou nuu, ma le aiga o lou tamā, a e alu atu i se nuu ou te faasino atu ai ia te oe.”* Talofa ia Aperamo, e le faigofie ia te ia le finagalo o le Atua lea ua oo mai. A faigofie faapefea, o lea ua fai mai e tuu mea uma a e alu, a o le alu foi lea, e lē iloa po o fea e alu agai i ai. Atonu e lē taumateina le faanoanoa o Aperamo i le vaai atu i leni anoanoa’i o le a tuua, a mafaufau foi i le tele o tausaga sa galue ai, o le afu maligi ma le afu toto, o le timuia ma le laina.

A e lē gata i lea, a o le pologa i le tele o aso i le taumafaiga o atinae eseese auā se lumanai manuia; atoa ai ma lona faanoanoaga tele, ona o le faatonuga e tuua lona nuu ma tagata o lona nuu, ma le aiga o lona tamā, a e o lona tupuaga lea ma lona faasinomaga. Peitai ua lē avea ia mea ma mafuaaga na te lē usitaia ai le finagalo ma le faatonuga a le Atua, e leai, a e ua ia taliaina ma ua faapena foi ona fai.

O le faatuatua ua maua’ a ma le talitonuga ua mausali i le Atua, ua mafua ai. Ioe, ua lē ave lava le manao faaletagata e fai ma mafuaaga e teena ai le Finagalo o le Atua. A ua talia lava ma le loto maulalo, talia ma le loto fiafia, o le a lava le finagalo o le Atua, o lena; e lē faia se loto o le tagata, a o le finagalo o le Atua ia faataunuuina.

Ona alu ai lea o Aperamo e pei ona fetalai mai o le Alii ia te ia. Ua ave foi e Aperamo lana avā o Sarai, ma Lota le atalii o lona uso, ma o latou oloa uma lava na latou maua, ma tagata na latou maua i Karana. O le malaga a le tagata i le mea na te le o iloa le mea la e alu agai i ai. A ua alu a le tagata ua talitonu moni lava i le taitaiga ma le faasinoga a le Atua. A e o le alu foi a le tagata ua ia lagonaina lona valaauina, po o fea lava e ave i ai e le Atua, po o fea foi e finagalo le Atua e faanofo ai, o le a faapea lava ona usitai i ai. Auā ua ia iloa mautinoa, e faia lava e lona Atua mea silisili mo ia.

Ioe e tasi lava le mea na finagalo ai le Atua ina ia faia e Aperamo, na o le alu lava. Alu ese ma lona nuu, alu ese ma tagata o lona nuu, alu ese ma le aiga o lona tamā. A usitai i ai, e sili atu le tele o faamanuiaga na te maua, nai lo manuia o loo ia te ia. O faamanuiaga ia na saunia e le Atua. “*Ou te faia oe ma nuu tele, ou te faamanuia foi ia te oe, ou te matua faamamaluina lou igoa, e manuia foi oe. Ou te faamanuia atu ia te i latou, o e faamanuia ia te oe, ou te faamalaia atu foi ia te i latou o e fetuu ia te oe, e manuia foi ia te oe o aiga uma o le lalolagi.*” E lē masino le tele o faamanuiaga e maua e le tagata, e usitai ma faia le finagalo o le Atua, tusa lava pe na te lē iloa le mea e alu agai i ai. O le feau lea o le Talalelei mo i tatou. O le fetalai mai o le Atua ma lona finagalo fa’aali mai, o se manatu faatauva lava, ia usitaia ma faataunuuina. O le tagata faatuatua faamaoni ma talitonu i le Atua, na te lē fesiligia lea faatonuga, na te lē teena foi lona fetalai mai, auā o loo ia mautinoa, o le usitaia ma le faia o le finagalo o le Atua, o le mea pito sili lava lea ona atoatoa lona faamaoni, ma o se mea e tatau lava ona fai.

Ua valaauina le tagata e le Atua tatou te atia’e e ala i feau ma galuega, a o valaauina eseese. A o le fesili lava e tulai mai, O tatou usitaia ea lea valaau? O tatou talia ea lona fetalai mai? O loo ia te oe lau tali, o loo ia te au foi la’u tali, a e ou te manatu, e lē iloa gatā le tagata e usitai ma faia le finagalo o le Atua. E iloa i le soifua faaleagaga o tagata, e iloa i le mafutaga

soosoo tauau o le tasi i le isi, e iloa i le ola fealofani ma ola fefaamagaloa’i o tagata.

A e le gata i lea, a e o le filemu o le Atua e vavala mai i le soifua ma le ola o le au faatuatua. O galuega foi e faatinoina o loo atagia ai faamanuiaga a le Atua e ala i le soifua usitai ma le ola faatuatua o ona tagata. E i ai taimi e manaomia ai lo tatou o ese mai o tatou seetaga mālū, o ese mai le olaga filemu, a e o atu i le lē iloa, o atu i le ola tauivi ma faigata, ina ia mafai ai ona pupula o tatou mata i le silisili ese o le Atua, ina ia tatou iloa ai le Atua o faamanuiaga. Tusa pe tatou te lē iloa le mea tatou te o i ai, tatou o ma tauivi ma le faatuatua, tatou savavali i ai ma le faamoemoe, o loo taiala le Atua.

Fai mai Iesu, ua i ai mea e nonofo ai outou i le fale o lo’u Tama, pe ana leai semanu ou te alu e su’e se mea e nonofo ai outou. Tatou te le iloa po o le a le mea o le a tupu taeao, a e pau a le mea ia mautinoa, tatou te o e faafeiloai taeao ma le talitonuga, o loo faatali mai Iesu e tautoalua i tatou, ua uma ona Ia tapena mo i tatou mea uma. E le masino faamanuiaga a le Atua i lou soifua ma lo tatou ola e le gata i totonu o Aiga, Nu, Ekalesia a e faapea foi i le Atunuu. A o foliga vaaia ia o lona alofa mai ina ua e le faafiti a ua e faatino i le usitai lona finagalo fetalai mai. Ia tatou faamalolosi ma loto tetele, ‘aia le faavaivai, tatou galulue pea e faatino lona finagalo ma lo tatou mautinoa na te faamanuia mai ia te i tatou.

O Iesu Keriso lava na Ia faailoa atoatoa mai le uiga moni o le ola usitai. Le usitai na Ia ofoina atoa ai lona soifua e faatino ai le faaolataga mo le lalolagi. E ui ina tiga ma faigata toe matagā, a e na tautino lava le Alii, ‘Aia le faia lo’u loto a o lou finagalo. Le faaolataga lea ua tatou maua mai ai manuia e tele mai le Atua e ala i lo tatou faatuatua ma lo tatou talitonu faamaoni ia te Ia.

“Ua fetalai mai le Alii ia Aperamo, Ia tuua e oe lou nuu, ma tagata o lou nuu, ma le aiga o lou tamā, a e alu atu i se nuu ou te faasino atu ai ia te oe.” Soifua ona o Iesu. Amene.

Saunia susuga Falaniko Sio FS,
EFKS Mutiatele ma Lotopu’e
Pulega Aleipata
Matagaluega LOTOFAGA LEPA ALEIPATA

MALUMALU FOU EFKS PETANIA FOU, FALEATA

“O le aso lenei ua faia e le Alii, ia tatou olioli ma fiafia i ai.”

O le Aso Faraile 26 Setema 2025 na faapaia ai le malumalu fou o le EFKS Petania Fou, i Toamua uta, o le Pulega Faleata Sisifo, o loo galulue ai le susuga Enoka Pouniu FS ma le faletua ia Lila. O le Toeaina o le Pulega susuga Iosefa Afutiti FT na ta’ita’i le sauniga mamalu na molimauina e le Laulau o le Fono Tele – afioga Taitaifono susuga Enefatu Lesa FT ma le faletua ia Seira, Susuga Failautusi Aoao Dr. Taipisia Leilua FS, susuga Teutupe Melepone Isara FS; o le Taitaifono Komiti Au Toeaina susuga Asotasi Gu Time FT ma le faletua, le Toeaina Faatonu o le Matagaluega Faleata, susuga Misipalauni Faatau FT ma le faletua, le Tiakono Toeaina Faleata afioga Mataia Apisaloma TT ma le faletua, ma le toatele o Toeaina ma Faafeagaiga mai itu eseese o le Ekalesia, tainane le mamalu o aiga faapea le Matuaofaiva ma le Falefa o le Aiga Salemalama. Sa maua luga foi le aso i le auai ai o le mamalu faalemalo, i afioga i Faipule Faleata ia Ale Vena Ale ma Faumuina Opapo Soana’i.

Na muamua ooti le lipine e le faletua ia Tina Iosefa Afutiti, ona tauaaina lea o ki o faitotoa o le malumalu e le afioga i le Matuaofaiva, afioga ia Tuifaasisina Taito. Na ulufale le mamalu o le Ekalesia ma faagasolo le sauniga. O le Tusi Paia na faitauina e le susuga Tiafaafo Gatoloai FS (Tulaele), o Talosaga na taitaiina e le susuga Siaosi Mataia FS (Vailoa tai) a o le Lauga na saunia e le susuga Muafo Fagasua FS (Vaitele uta). O le susuga i le faafeagaiga ia Enoka Pouniu FS na saunoa i le Tala o le Galuega.

O le mae’a ai o le Talisuaga Paia na ta’ita’iina e le Toeaina ia Afutiti, na saunoa ai le afioga i le Taitaifono Fono Tele, fai ma sui o le Ekalesia Aoao e molioo le faamalo ma le faafetai i le susuga faafeagaiga ma le faletua ma le Ekalesia i Petania fou, e tusa o le galuega tele ua faia, i le faatuatua ma le soifua tautua faamaoni i le Atua. Na ia faamanuia le soifua osi taulaga, ma saafiafiga ina ia saga faatuputele e le Atua ona manuia, i nisi foi galuega tetele o le lumanai. Ona ia taua lea o le meaalofoa a le Ekalesia e \$20,000 e tusa ma ana faiga faavae, faapea foi la’ua lava meaalofoa ma le faletua ia Seira Lesa. Na taua luga le aso fiafia i le tausamiga tele ma fa’aaloaloga masani faaleaganuu, na saunia e le paia maua luga i le Ekalesia i Petania fou. Malo faafetai. Ia i le Atua le viiga ma le faaneetaga, ana le seanoa o Ia e le tau lau o le faamoemoe.

Tala o le Galuega:

(Saunia susuga Enoka Pouniu FS)

“Afai e le atiina a’e e le Alii le fale, e galulue fua i latou o e atiina a’e;”

O le Aso Sa 24 Novema 2024 na tuuina ifo ai le Maa tulimanu o le galuega, a o le Aso Lua 26 Novema 2024 na amata ai loa le galuega o le malumalu. Na valaaulia ni tauofoga mo se konekarate na te fausia le malumalu, ma tali mai ai e 2 konekarate Saina, ma le konekarate a Soalo Faamanu, faapea le konekarate a le afioga Tuifaasisina Taito, sa sili ona pa’u lana ofo e \$500,000, o lea na manumalo i le tauofoga. O le maliega e 10 masina o le a fai ai le galuega, i le tele o le falesa e 80’ x 40’. Na toe talosaga ma fautuaina e faaopoopo/faatele teisi le malumalu, ona suia lea i le 110’ x 48’ le fua, peita’i sa tumau pea le tau e pei ona ulua’i ta’ua. Na toe faaopoopo le \$50,000 mo le teuina faalatele o le fanua i autafa i fafo fuafua mo le maota o le faafeagaiga i se aso aulia i le alofa o le Atua, maua ai le tau e **\$550,000**. O le ata na tusia e le faifeau susuga Kolia Kolia FS (Komesina Fanua ma Fale EFKS) i le tau e \$5,000.

O ala tupe eseese: O le Lulu e \$215,000, Leitiofoni \$100,000, Tausala \$80,000. O le susuga ia Kolia Fiu Kolia FS (Faafeagaiga EFKS Cambelltown, Pulega Sini i Sasa’e, Matagaluega Niusaelese i Sisifo, Ausetalia) a o avea ma Toeaina o le Pulega, sa latou fai tapuaiga i le tausaga 2024. Na faatau i ai le talosaga a le Ekalesia Petania fou, mo se fesoasoani mai e ala i se malaga su’etupe e alu atu. Na talia lelei e le Toeaina le talosaga; o tuutuuga e le malaga atu le Ekalesia, a e lafo atu le faatuatuga o le a fesoasoani mai lana Aulotu; e \$120,000 na auina mai i le 2024. O loo totoe le \$70,000 o le tau o le konekarate, peitai e maua luga le faamoemoe e mafai ona maua i lenei aso, i po siva ma le ma’au o aiga ma le au valaaulia. O le pulelaa & laulau Faamanatuga na saunia e le Aulotu o lona tau e \$110,000. O nofoa o le malumalu na saunia e le Mafutaga Tina e \$111,150; o le moli tele, ea malulu, & tioata e \$10,000 na ofoina e le Tina ia Ario. O le tau atoa o le galuega, ina ua faaopoopo ai le teuteuina ma faalateleina o le fanua, e **\$661,150**. E leai se aitalafu o le galuega o i ai, vagana le Toomaga i le Ofisa o le Ekalesia. Malo le galulue, faamanuia le Atua.

'AUA LE FAALOTOLOTOLUA

"O le tagata faalotolotolua e faaletumau ia i ona ala uma." Iakopo 1:8

Ua apoapoa'iina tatou o kerisiano faatuatua, ina ia faautauta i le vaaiga o tatou loto – ia 'aia le pisia, afaina, manu'a pe mama'i o tatou loto, i le gasegase o le 'faalotolotolua'; o le taumafai lea e mafaufau i auala e lua i le taimi e tasi. Fai ma faataitaiga: tatou te o i le Lotu i Aso Sa ina ia tatou maua le poto mai lugā – *"¹⁷poto mai luga e muamua ona mamā, i le ua filemu, e agamalu, e ganagofie, e tumu i le alofa, ma fua lelei, e le alofa faapito, e le faataga fai"* Iako 3. A e mae'a le sauniga, ona tatou aumai lea o le poto mai lalō, ma tatou taumafai e faafefiloi faatasi ma le poto mai luga. Peitai e lē mafai ona tupu lea mea, e lē manuia.

E lē mafai ona e tuufaatasia/faafefiloi le penisini faamamā, ma le suauu kiso, e ui ina foliga tutusa. O le taimi e te faia ai faapea, ona e faaleaogāina lea o le penisini ona o le suauu. O le aveai ai ma kerisiano, tatou te o i lotu i le Aso Sa ina ia aveai ma penisini ua faamamā; a e oo i le Aso Gafua ua tatou o atu i le lalolagi ma faa-kiso ai. O le ala lea tatou te vaivai ai, ma tuufesili pe aisea ua tatou lē lavā ai. O le mafuaaga, ona e lua ituaiga mafaufauga, e lua ituaiga loto – e faalotolotolua.

O se isi faataitaiga: e lua alaleo o le leitiō i totonu o le taavale – o le AM ma le FM, e eseese ituaiga. E te filifili poo le fea le alaleo e tasi e te fia faalogologo ai, a e lē mafai ona e faalogo i alaleo uma e lua i le taimi e tasi, e ui ina o loo maua uma. O le mea lea, ia faalogo i le alaleo mai lugā, e aumai ai faalumaga faaleagaga e sili ona poto ma atamai, e maua ai le tofa loloto ma le utaga mamao faalelagi. O la le aposetolo o Iakopo 1: *"⁵A e afai ua leai se poto i so outou, ina ole atu ia i le Atua, o lē foai tele mai i tagata uma ma le lē toe ta'uta'ua; ona foaiina mai ai lea ia te ia. ⁶A ia ole atu ma le faatuatua, aua lava nei masalosalo; auā o lē masalosalo e tusa ia ma le peau o le sami ua sousou i le matagi ma felafolafoa'iina. ⁷'Aua lava nei manatu lea tagata na te maua se mea e tasi mai le Alii; ⁸o le tagata faalotolotolua e faaletumau ia i ona ala uma."* E tali mai le Atua i le faatuatua e moni lona faasagatasi na o ana afioga tusia ma folafolaina. O le mea lea, ia 'aia le toe faalotolotolua!

F.T.

O LE ATUA FAAOSO, TULEI MA SAPO

"¹¹E pei o le aeto ona faaoso i ana tama" Teu32.

O le pese faamavae a Mose, o loo ia faamatala e faamanatu ai le tausiga a le Atua mo Isaraelu, a o la ta'ita'i mai la latou malaga. O le tausiga a le Atua, ua faatusa i le gaioiga a le aeto e fai mo lana toloa'i – na te tautulei ma taufaaoso ana tama, ia aveese mai le ofaga, ina ia latou iloa ai ona felelei na o i latou. E pei ona faamatala e se tasi tusitala: E 'eu'eu mālie e le aeto lana toloa'i aga'i i le pito o le faamoega. E gatete le tātā o lona fatu i taimi uma na te tago atu ai e tulei, a e taia lona lagona i lo latou faatautee mai. Aisea e amata ai le olioli e lele, i le fefe ne'i pa'ū? Mata o lenei fesili mai le vavau e le'i mafai lava ona ia taliina. O le ofaga na ia faia i le mea maua luga, i se pito papa, ia faigofie ai ona faapa'ū ese lana toloa'i. A o lalo ifo na o le 'ea na te lagolagoina le apatā o apaau o lana toloai. Mata o le taimi nei o le a lē mafai ona lavea'i mai, e pa'ū atu ma fano ai lava? O lona lea masaloga.

E ui i sona fefe, a e na iloa e le aeto ua oo mai le taimi. O lana tausiga faamatua, ma lana misiona faatina ua toeitiiti mae'a. Toe tasi le laasaga o totoe – o lona tago atu e tulei ese mai le ofaga. Na maua e le aeto tina lona malosia ma lona toa, mai le atamai o loo teu mau i totonu e ala i lona silafia mai aso ua tuana'i. E oo mai i le aso e iloa ai e lana toloa'i o loo i ai o latou apaau, sa le'i i ai se uiga mo latou ola. Se'ia oo i le aso latou te iloa ai felelei maua luga, latou te le'i malamalama i le fa'aamuia o le fanau mai o se aeto. Mo le aeto tina, o lana tulei, o lana mea alofa aupito sili lea e ofo atu mo lana fanau... o le fa'aaliga aupito maua luga lea o lona alofa mo i latou. Ona ia tago atu lea, ua tulei ese auaua'i i latou... ma na latou felelei! Na mafai, na iloa ona felelei. Fai mai le Tusi Paia, *"¹¹E pei o le aeto ona faaoso i ana tama, e faapepepepe i luga o ana tama, e fola ona apaau, e saposapo ia te i latou, e ave ia te i latou i luga o ona apaau; ¹²sa faapea le Alii e toatasi ona ta'ita'i ia te ia."* Teute 32. O tulei ese oe e le Atua mai lou sone mafana? Ua tuli oe mai lau galuega, ua leai se totogi, ua faaletonu le tulaga o au aitalafu ma nogatupe? Ua motusia le lua mafutaga sa manatu e umi ma fai fai pea? O e manatu ua tulei ese oe mai lou faamoega, ma ua e pa'ū ese mai luga o le papa maua luga? 'Aua e te fefe, e sapo'ia oe e le Atua, ma a'oa'oe ia e iloa lele maua luga.

F.T.

PEPA MAFUTAGA FAAFOUINA 2025
MATAUPU SILISILI FAAVAE FAA-LE-AGAGA O LE EKALESIA
FAAPOTOPOTOGA KERISIANO SAMOA (EFKS)
(Saunia susuga Professor Dr. Vaitusi Nofoaiga FS, Pule Kolisi Faafaifeau Malua)

Faatomuaga

I le ava tele, e faailoa ai mo le silafia, se taumafaiga ina ia toe āsia le tusi o le 'Mataupu Silisili o le Faavae Faa-le-Agaga o le Ekalesia LMS (The Statement of Doctrine of the Samoan Church (LMS)).' E i ai le lagona vaivai e taua tele lenei tusi a le Ekalesia, ma e tatau lava ona toe faia i ai se galuega a le Ekalesia auā ona augatupulaga fai mai. O se tusi foi e tatau ona o faatasi ma le Faavae o le Ekalesia ma le tusi o Iugafono Tumau o le Ekalesia. O loo tusia i le amataga o le tusi lenei, na tuu faatasia le Mataupu Silisili o le Faavae Faa-le-Agaga o le Ekalesia i le tausaga 1955 e Rev S. G. F. Phillips, Rev J. Bradshaw, Rev L. A. Brame, Elder Tapeni Ioelu ma Pastor K. T. Faletose. Na talia aloaia lea galuega i le Fono Tele i le tausaga 1957, a e na toe lolomiina (reprinted) i le tausaga 1995. Faafetai i le finagalo o le Komiti o Malua, mo le toe iloiloaina ma le tatau ai ona toe faamatala faalatele Mataupu Silisili nei o le Faavae Faa-le-Agaga o le Ekalesia, mo tupulaga fai mai o le Ekalesia. Ua mautū Mataupu Silisili Faavae Faa-le-Agaga o nisi Ekalesia, ma ua a'oa'oina ai o latou tupulaga, ma ua faalogologo i ai nisi o a tatou fanau ma tupulaga ma faasesēina ai, e aunoa ma so latou iloa, o loo i ai foi a tatou aoaoga i nisi o mataupu ia.

Na tutoatasi le Ekalesia i le 1961-1962, ina ua avea ma Ekalesia Faapotopotoga Kerisiano Samoa, e pei ona i ai i le Faavae o le Ekalesia, ae e le o i ai i le Tusi o Mataupu Silisili Faavae Faa-le-Agaga o le Ekalesia, ia le Mataupu Silisili Faavae o le Ekalesia Faapotopotoga Kerisiano ma ona mau faavae mai i le Tusi Paia. O le lagona vaivai, ua manaomia le tuu i totonu o Mataupu Silisili o le Faavae Faa-le-Agaga o le Ekalesia, se faamatalaina faalatele o le Mataupu Silisili o le Ekalesia Faapotopotoga Kerisiano e pei ona i ai i le Faavae o le Ekalesia faatasi ai ma nisi faaopoopoga ma le faalateleina o mataupu silisili faavae, auā tupulaga o le Ekalesia. O le a faamatalaina i lenei pepa ni faataitaiga, o ni Mataupu Silisili taua i le lagona faatauva, e tatau ona i ai, mo le faamoemoe o le Galuega Tala'i a le Ekalesia.

O nisi faataitaiga o ia Mataupu Silisili:

Mataupu Silisili o le Ekalesia Faapotopotoga Kerisiano (EFKS)

Mo le Ekalesia Faapotopotoga Kerisiano Samoa, o le Ekalesia Faapotopotoga Kerisiano e na te faataua le Ekalesia i le Aulotu, e avea ai le Aulotu ma faapotopotoga autu e talanoaina ma faia a latou lava filifiliga mo mataupu ma fuafuaga faa-le-aulotu. O lea faamamafa e faavae lava i le Pule Aoao a le Atua ma le faatauaina o tagata uma taitoatasi o e ua tofia ma faapaiaina e le Atua mo lana Ekalesia. E faataua e le Ekalesia Faapotopotoga le saolotoga o le tagata lotu e ola ma faatino ai le finagalo o le Atua. E lua sauniga o sakarameta e faatino ma faataua i tapuaiga i le Atua e le EFKS – o le Papatisoga ma le Faamanatuga. O le mau tauave mai le Tusi Paia e pei foi ona i ai i le Faavae o le Ekalesia, o loo ta'ua i le Mataio 16:15-20 ma le Mataio 18:15-20. O nisi nei o upu o loo i ai: “...o se mea foi e te fusifusia i le lalolagi, e fusifusia foi lea i le lagi...E moni, ou te fai atu ia te outou, O mea uma tou te fusifusia i le lalolagi, e fusifusia ia i le lagi; o mea uma foi tou te talā i le lalolagi, e tatalaina ia i le lagi. Ou te fai atu ia te outou, Afai e loto gatasi se toalua o outou o i le lalolagi i se mea la te ole atu ai, e faia lea mo i laua e lo'u Tama o i le lagi. Auā o le mea ua faapotopotoina ai se toalua, po o se toatolu i lo'u igoa, ou te i ai faatasi ma i latou.”

Mataupu Silisili o le Faatinoga o le Soifua Fai Taulaga o le Ekalesia (Taulaga Ofoina ae le o le Sefulua'i (Offering or Voluntary Giving not Tithing))

O loo ta'ua i le tusi o Levitiko 27:30, o le sefulua'i o mea uma e maua i le elelee, o ā le Atua ia, o mea ua faapaiaina mo le Atua. O le faamoemoe o lea faigataulaga, o le ofoina lea o le ulua'i fua po o le fua e sili ona lelei mo le Atua. Ina ua afio mai Keriso, le Alo o le Atua, feagai ma le Galuega o le Talalelei, seia oo lava i lona maliu i le satauro, ma toe tu manumalo mai le oti, e le o se taulaga na vavae mai o se vaega. Na aumai o le taulaga atoa, aumai faatasi ma le soifua o le Alo o le Atua, o le Alofa Tunoa lea

o le Atua, ina ia ola le lalolagi agasala. O lona uiga, e mai le loto ma le agaga e tataua ona faia ai le taulaga ua ofoina mo le Atua, e faavae lava i le alofa tunoa lea o le Atua. O le ofoina lea o le taulaga e sili ona lelei, e faia mai le loto malie ma le loto fuatia ifo lelei, e le faia mo se tau, ona o le uiga ma le faatinoga lea o le alofa tunoa (χαῖς) (1 Corinthians 8:1). Faia o se galuega lelei, ua ofoina mo le isi.

Mataupu Silisili o le Tapuai o le Ekalesia Faapotopotoga Kerisiano Samoa i le Aso Sa.

O le Ekalesia Faapotopotoga Kerisiano Samoa e na te faatauaina le Aso Sa, o le uluai aso o le vaiaso, e fai ma aso faapitoa, e faia ai tapuaiga i le Atua. O le faatauaina e le EFKS o lenei aso, e i ai ona taua ma a'oa'oga faamataupu silisili i le soifua auaina o le tagata i le Atua.

O le Aso Sa, aso muamua o le vaiaso, o le aso lea na toe tu ai Keriso. O le faia la o tapuaiga i le Aso Sa, e faamanatu mai ai pea le toe tu o Iesu Keriso, na faaolaina le tagata agasala.

O le toe tu o Keriso, ua avea o se amataga fou i le soifua taumafai o le tagata faatuatua, ua salamo, ma talitonu faamaoni i le Atua. O lona uiga, o le tapuaiga i le Aso Sa, e mafai ona avea o se avanoa e faatupu ai se amataga fou lelei, o se faaletonu na alia'e mai i le vaiaso ua tuana'i atu

E ta'ua foi le aso muamua o le vaiaso, o le aso e tau ai le ulua'i fua, i tu ma aga faalutaia, na afua mai ai le Talalelei. O lona uiga, o le Aso Sa, o le aso muamua o le vaiaso, ua faia ai tapuaiga i le Atua, o le aso foi lea e faamanatu mai ai i le tagata le avea o ia ma ulua'i fua i le lelei ma le faatuatua, i le loto ma le agaga, po o le loto ma le agaga ua faamuamua le finagalo o le Atua, e ave ai le tapuaiga e moni ma faamaoni i le Atua. O ulua'i fua faaleagaga e i ai le lotomaulalo, o le agamalu, o le salamō, loto faamagalo, alofa, ma isi.

O le faatinoga o tapuaiga i le Aso Sa, le aso muamua o le vaiaso, sa amataina e le Ulua'i Ekalesia (Mataui 28:1; Mareko 16:1-2; Luka 24:1; Galuega 20:7), ma ua fa'aauau pea e le Ekalesia Faapotopotoga Kerisiano Samoa lenei faataua.

Mataupu Silisili o le Tapua'i Filemu o le Ekalesia i ana tapuaiga:

E faataua e le Ekalesia Faapotopotoga Kerisiano Samoa le tapua'i filemu. E faatino i le 'aia le soona

pisa, sisiva, ma isi lava faiga e manatu e lē mamalu ai le tapuaiga i le Atua. E mamalu le Atua, ma e tāua le faamamaluina o le faatinoga o le tapuaiga. A o se faatinoga faa-le-tapuaiga e faatāua ai le mafutaga filemu a le tagata tapua'i ma le Atua. O nisi o mau mai le Tusi Paia e faatāua ai le tapua'i ma le filemu i tapuaiga a le EFKS.

O Elia i luga o le mauga (1 Tupu 19:12): “...e le i ai le Alii i le afi; ae mulimuli i le afi, o le leo filemu ma le itiiti.” O le fesagaiga lenei a Elia ma le Atua, ua a'oa'oma mai ai, o le leotele o le tapuaiga i le Atua, e mafai lava ona maua i le lagonaina o le papa'i mai o le Agaga o le Atua, i le filemu ma le lē gaoiā.

Sapakuka 2:20: “A o le Alii ua i lona malumalu paia o ia; ina faalologo ia le lalolagi uma i ona luma.” O le faalologo i le Atua, e faia lava i le filemu, e faailoa ai le faatauaina e le tagata tapua'i, o le mamalu ma le silisili ese o le Atua.

1 Korinito 14:5: “Ou te loto ina ia outou tautala uma i gagana eseese, a e sili lo'u loto ina ia outou perofeta ane; auā e sili le perofeta ane i le tautala i gagana uiga ese, vagana ua faamatalaina ina ia faamafanafanaina le ekalesia.” Na molimauina e Paulo, le eseese o le tautala i gagana eseese ma le perofeta ane. O le perofeta ane o le faatinoina lea o le tapuaiga i le filemu. O le atugaluga o le aposetolo, ona ua fa'aaogaina e nisi o tagata tapua'i le tautala i gagana eseese, e su'e ai ni o latou viiga, o i latou o ni tagata amiotonu, ma ua na o i latou foi ua fa'aali mai i ai le Agaga o le Atua. O le isi foi vaivaiga, o le pelogia ai e tagata nei, fai mai ua mafai ona tautala i gagana eseese, nisi tagata tapua'i, ae e le o le mea moni lea o loo tupu. O ni faatinoga ua faatuputeleina, ona o le tausili lava i viiga o le faafiaamiotonu. E faataua tele ai e le aposetolo o Paulo le perofeta ane, o le tapua'i lea ma le filemu – i lona lagona, o le ala lea e maua ma lagona ai e le tagata faatuatua tapua'i i le Atua, le faamafanafanaga mai le Atua.

O le Mataupu Silisili o le Pulou o Tamaitai:

E faataua i tapuaiga i le Atua, a le Ekalesia Faapotopotoga Kerisiano Samoa, le Pulou o Tamaitai i Tapuaiga – o se tasi o faatinoga e faailoa ai o Iesu Keriso, o ia lava o le Alii o le Ao o le Ekalesia. O le pulou o tamaitai, e faailoa ai le amanaia e le itupa o alii, o le tutusa ai o o latou sao ma tamaitai i le aveina o tapuaiga o le viiga ma le faafetai i le Atua e ala ia Iesu Keriso le Ao o le Ekalesia. E ta'ua e le aposetolo o Paulo (1 Korinito (fa'aauau itulau 12)

O LE PEROFETA MULIMULI

(O le tala faafagogo ua faaSamoa mai le tusi, The Last Oracle, tusia e James Rollins)

“Tau lava o le faagaogao o le nofoaafi,” na fai atu ai Monike. “E tatau ona ou faagasolo i le vave e gata ai.”

Na faatagitagi atu Monike i autafa o le nofoaafi a o ia tamo’e. Na ia tauave fana e lua sa faataupe i lona tauau, e tofu ma pulufana ta’i onosefulu. Ua uma ona faasino atu e Konesetativo le lesone e uiga i ki faatonutonu o le nofoaafi. Sa lē o se mea tele.

Alu i le taavale pito i luma, toso i luga le liva.

Na taunuu atu i le nofoaafi, o Monike na tamo’emo’e atu i le tasi itu, o Konesetativo i le isi itu. “O ese tagata uma i fafo mai le nofoaafi!” na valaau atu ai Monike. “Fafo mai faitoto’a!”

Na valaau atu faaRusia e Konesetativo ana faatonuga.

Ui i lea, sa malo pea le vevesi mo le isi minute atoa. O tamaiti sa fetagisi pe fe’ei tauvalaau. Na aapa tau fetagofi atu lima ia te ia, a o taufetuli tautifatifa. A o tamaiti foi ua uma ona a’oa’oina lelei ina ia usitai i faatonuga. Na sui malie le vaaiga, o tamaiti na amata ona gasolo ifo i le laina ma agai atu i faitotoa.

Ua lē toe tumutumu lalo o vae, ona taunuu lea o Monike i le taavale mulimuli, o se taavale o ufiufi. Na ia oso atu i le faitotoa matala ma agai i le tausiusiuga i luma. O se nofoa ititi o le avetaavale na si’osi’o i ona itu e se ki lanu meamata ma mūmū. Meamata o lona uiga ia alu. Mūmū lona uiga o taofi. O se laupapa ititi o faailoilo na faailoa mai ai fuainumera faatonutonu. Sa le’i ai se taimi o Monike mo auiliiliga. Na ia faalagolago atu i fafo o le faamalalama. “Konesetativo!”

Na toe foi mai le leo o le tama ia te ia. “Ua kilia! Alu loa!”

Ua lelei tele.

Na uunai atu e Monike le ki lanu meamata i luma. Na oso le eletise, feemo ai ni sipaka i le pogisa i luma atu. Na oso i luma le nofoaafi, ona amata lea ona taavale ese mai le ana.

Toe fa minute.

E tatau ona ia ave atu le nofoaafi i le isi itu o le ana a e le’i toe ola mai mea pueata. Ua tuu atu ia Konesetativo na tea vatu tamaiti i fafo o le ana ma tapuni faitotoa pa. Ua uma ona faatonu e Monike le tama pe faapefea ona sosofa faaleaga kia ina ia tapunia ai pea faitotoa.

O Konesetativo sa i ai foi se isi ana feau.

O Monike sa ia faoina mai ni leitiō se lua a tagata faigaluega i maina. E taunuu loa Monike i faitotoa o

le faasiusiuga, ona ia faailoa lea ia Konesetativo e tatala faitotoa. Pe afai e gasolo lelei fuafuaga e pei ona faataatia, o le a maua e Monike le tulaga lelei o le faafuase’i – ma fana e lua ua utu faatutumu lelei. E ui ina pei o se misiona faapule i le ola, a o le a se isi ana filifiliga e fai? O loo sagalemu tamaiti i le taimi nei, peitai afai e taunuu le Fuafuaga Satani, e fia miliona le faitau o isi o le a maliliu? Sa leai se isi mea e fai e Monike, na o le osofa’i pei o se afā o le potu faatonutonu, ma le tafana pulu salalau o ana meata. I le amataga, na ia mafaufau e faaleaga le nofoaga o maina, peitai sa le’i fiafia i ai Konesetativo. O faapāpā e limasefulu le aofai sa faapipii faamuamua faatasi ma leitiō faapā. Tusa lava la pe na te mafai ona sesele le afa kilomita o ogapaipa i le fa minute ina ia oo i ai, a e o sina masepu lava i le tagofia o faapāpā o le a pasae ai loa.

O le ala lea ua mautu ai le tonu ua fai.

Na pa’ō’ō atu uili o le nofoaafi a o taavale atu i lalo i le ana pogisa, sa fai ma malamalama i matauila. O le taavale foi pito i luma sa i ai lona moli e tasi, na suluia atu ai luma. A o faasolo ina saosaoa atu le nofoaafi, na maitauina e Monike fuainumera i luga o le puipui e iloa ai le faitau aofai o le umi o le auala. E tusa ma le vaai a Konesetativo, o le ana e 4 kilomita. Na taofi le manava a Monike, a o ia faitau le minute atoa i lona mafaufau. O le itu taumatau, na ia iloa atu ai le numera 2 o tusi i le puipui.

Toe afa ona oo lea.

E ititi ifo ma le tolusefulu sekone lona taimi e avanoa.

E lē o lelei, ae lē leaga foi.

Ona pe faafuase’i lea o le moli, peisea’i na pati le aao o le Atua.

O lalo ifo o Monike, na mapuea ai le nofoaafi, pei e tali mai i lona fememea’i. I le aunoa ai ma se eletise, na taavale atu ai le nofoaafi ma tu i totonu o le pogisa pato’i.

O ona tua atu, mai tua o le nofoaafi, na maoga a’e ai le faataiō a se tamaititi i le fefe. Na fufusi mau le tino o Monike. Na ia iloa lelei le leo lena.

O Piota.

Na faatau sioa Savina i le faaputuga o televise pogisa i totonu o le potu faatonutonu. Sa lūlū lona ulu.

O minute talu ai nei, na logo atu ai o ia e se tasi o inisia ia sau i lalo nei, ona o le popolega e uiga i se faalētonu na maitauina, o se mea faasino i faitotoa malolosi i le taufaasi’usi’uga o le ana. E oo ane i le

taimi na taunuu ifo ai, ua pe pe uma mea pu'eata, a o faagasolo siaki toe faalelei.

E leai se tasi na ia faatonuina.

Ua tetemu ona mone i le masalosalo. E i ai se mea ua faaletonu. Na ia lē nofononofo lelei, a e fai le gaioiga e tatau ma tape uma le paoa i totonu o le ana.

“M.C. tolu tolusefulu-fitu,” na fai atu ai Savina. “E i ai le potu faatonutonu faaleoleo i le nofoaga o le maina.”

O se tasi o inisinia, e faaeletise, na ia lue atu ia te ia. “E tusa ma lo'u manatua, e i ai le mea pu'eata o loo fausia faapipii i totonu o le faleoo faatonutonu i o. E mafai ai ona e fesootai i inisinia o loo i le isi itu.”

Na toe lue mai le ulu o le tamaloa – ona pupula faalautele lea o ona mata. “O loo i luga o se pookalame tutoatasi mai le ana.”

O se fuafuaga na inisinia fai fuafua ne'i i ai se faaletonu e tula'i mai e pei ona ua i ai nei, ina ia mafai pea ona fesootai nofoaga faatonutonu e lua.

“Faaola mai le meapu'eata lena.” Na ia tago atu ki se tasi o televise.

Na topetope lava le omiomi a le inisinia i luga o lana komepiuta. Toeitiiti, ona ola mai lea le laau i le lanu uliuli ma pa'epa'e. O le meapu'eata e laitiiti ma faigofie ona fetuuna'i, sa faatu i luga a'e o le laupapa faatonutonu o le faleoo ina ia maua lelei atu le ata o le tagata na te faafoeina i le isi itu.

Na punou latalata atu Savina e vaai. O fafo atu o le faitotoa matala o le faleoo, na maua ai e le meapu'eata le fe'oma'i solo o ni tamaiti i le ana i lalo. O tamiti e toatele. Tamaiti na faafeosofi i luga o le nofoaafi.

Na taumafai Savina e faavasega ia malamalama, a e laa ane loa se tamaitiiti umi i totonu o le vaaiga o le meapu'eata. E tino umi, lauulu lanu uliuli, ma ona foliga umi faasasapa. Na uu mau e Savina ona tamatamailima. Na ia iloa le tamaitiiti.

O Konesetatio.

O le a le mea lea ua tupu?

Ona o le tele o mea na tutupu i lenei taeao, sa le'i maua ai sona taimi e siaki atu ai Lutena Porosakova i lana tuliloaga o le Amerika ma tamaiti e toatolu. Na ia vaai atu a o tālo atu lona lima ma valaau filemu atu i le anoano o tamaiti. Ua manino mai, ua lē manuia le taumafaiga a Porosakova.

A o le a la latou mea o faia i o?

Na ia autilo solo, tau saili pe iloa atu le Amerika ma isi tamaiti e toa lua. Na ia sailia faapitoa le tamaitiiti e toatasi, le tamitiiti na ia mana'o e toe fia maua mai.

Na faataiō Piota a o ufitia o ia e le pogisa. Na faalautele ona laumata e tau saili se malamalama, a o fusi mau o ia e Marata i ona lima malolosi. Na fa'aaoga e le toa lua lea le vevesi i le isi itu o le ana e sosola atu ai i le taavale mulimuli ma lalafi ai.

Na iloa e Piota e tatau ona ia faatasi ma le tamaloa.

A o le pogisa...

Na faamaga le gutu o Piota tau manava, ua malemo i le sami uliuli pato'i. Na ia faalue a o taumafai Marata e taofiofi o ia. O se miti leaga ua tupu moni. Sa masani ona ia faia le miti lea: o lona ataata na tu a'e i luga ma foloina o ia, ufitia atoa o ia se'ia oo ina na o le pogisa. Na pau le auala e puipui ai o ia o le susunu o ia i le afi, ia mu ai pei o se moliuila i le pogisa, ona ia ala a'e lea ma le faataitaiō.

Fai mai isi tamaiti na latou vaaia o ia o mu i totonu o a latou miti. I le amataga sa ia manatu o loo ula tamaiti ia te ia, ae i le mae'a ai o nai taimi itiiti, na amata ai ona ese la latou vaai ia te ia, ua seāseā ona latou toe talanoa atu, ua le toe ta'a'alo ma ia. Na oo foi i faia'oga sa latou faitai. Na latou otegia o ia, ua le toe avea i ai ni keke ma meli, fai mai o ia ua leaga ai isi tamaiti, ua oo i se tulaga ua leai se tasi e lelei ana su'ega i aso mulimuli ane. Na latou tu'ua'iina o ia i le faafefeina o tagata uma.

Ma e oo lava ia te ia ua fefe, e oo i ona ponaivi – ma e na o se miti lena. A o le pogisa lenei, ua le o se miti. I lona fememeai, na ia oono ai e sola ese, peita'i sa i ai le pogisa i soo se mea. Na ia saili se malamalama i le mea e lē maua i ai. E oo lava i lena auala sa taufaafefe ia te ia, ae na sili atu lea nai lo le leaga ua faafefeteina.

Mai le pogisa, na aliali mai ai ni ma'osi'osi o malamalama pei ni nila matuituia o su'i atu i se ie uliuli, o faamalosi le auai e lona taufaamata'u. Na amata na o nai mea itiiti, ae na faasolo ina faateleina. Na ia pupula ae i luga ao tulei atu e le laufanua o fetu le pogisa. Peitai na ia iloa le mea moni. E le o ni fetu. A o tauivi Piota ma le mafatiaga, sa tautatā solo lona fatu pei se manulele o loo saisaitia i se pa. Na ia tepa ae i luga a o faasolo ina pupula malosai mai fetu, ma fefete atili a o latou pa'u'ū latalata mai. Na ia iloa e tatau ona ia liliu ese. Peitai na pupula lautele ona laumata... e pei o le pogisa i totonu o ia. Na sailia foi e ia lea le malamalama, a o ia ōu mai le lua pogisa, o loo manao e fafaga o ia. Na faasolo ina pa'u'ū televave ifo fetu, na amata o laiti, ona mulimuli ifo ai lea o isi e tele. Mai itu eseese, na latou toulua ifo i ona luga, ma faapalalasi ifo ia te ia.

Na ia faalogoina le fetagisi ma lagona le tātā o fatu. Na latou faatumuina o ia i o latou malamalama. Na ia pa’ū atu i tua a o malepe ifo le lagi pogisa i luga ia te ia ma faamumū lona ogatotonu i le afi.

Na ia lagona atu se ōu mamao, o le tagi lapatai mai a se faamanukī.

Auā na iloa e Marata lana mea lilo.

I taimi e ala a’e ai mai ana miti leaga, pe a ala mai o faataitaiō, e lē na o le fefe – o le faailoga foi o le lē lavā.

E i ai se mea o loo matuai sesē lava i tamaiti.

O le uma ai ona tapē o le paoa, na fa’aauau ai ona iloilo e Savina o le meapueata mai le M.C. 337. E ui ina sa leai se leo, ae na manino mai o tamaiti sa faitai, milo solo i le fememeai, o nisi sa fetagisi, o le toatele sa savalivali solo pe tutula’i i le matuā tete’i. Na o le pau le tagata sa foliga mai o loo to’a ma faatonutonu o Konesetatino. Na ia fealua’i solo i le mea o i ai tamaiti, o le taimi ua iloa atu, ona toe leiloa atu foi lea.

Na autilo solo atu Savina pe o i ai Piota.

E ui ina sa i ai ana tamaiti Omega e sefulu, ae afai o i ai le tama i o –

Ona te’i lea ua iloa atu se tamaitiiti ua pa’ū ifo i le fola. Na liliu ane i ai se isi tamaitiiti, ona faapea foi lea ona pa’ū ifo ma ia, e pei na taia i se ogala’au. Na faasolo ina toulu ifo ma isi tamaiti. O se tasi tamitiiti na tamo’e ese – na pa’ū ifo foi o ia.

Na iloa atu foi e le inisinia le mea ua tupu. “O le pisia i le kasa oona?”

Na o le faatau pupula o Savina, ua lē mautonu. O le tuufaatasiga o le malosi o kasa leitiō e lē afaina sei vagana ua papa’i atu i inumaga mauululuga o kasa feavea’i. O faitauga i le M.C. 337 e le’i oo i lea mauuluga. Toe itiiti, ona toe iloa ane lea o Konesetatino. Na ia amo ane se teineitiiti o galemu faapalupē i ona lima. O lona tuafafine o Kisika. Na pupula sa’o mai o ia i le mea pueata. O ona mata sa tumu i le mata’utia.

Ona iloa atu lea e Savina – e pei o se malamalama na mafiti ese mai mata o le tama. Na mou ese le fefe i le faanoanoa ma palasi ifo i lalo.

E lē o le pisia i le kasa oona.

E le’i inumia e Konesetatino ma Kisika le inumaga.

Na lagona atu se patatū mai luga a’e. Ma le isi, ma le isi.

Na pupula a’e Savina i luga.

Auoi! Leai..

Na ia faliu ma tamo’e aga’i i sitepu. Na ia lele a’e ta’i lua sitepu i le laa. Na milosia lona tua, ma lona

fatu na tātā tutu’i i le tiga. Na ia osotū atu i totonu o le potu sa faatali atu ai tamaiti ia te ia.

Ua tau fai toulu malepelepe, i nofoa, i le fola, o ulu sa taavilivilvi, o lima sa pepē. Na ia faanatinati atu ia Porisi, faatū ifo i ona tafatafa, ma siaki le tā tā o lona fa’a’i. Na ia lagona se tātā vaivai i ona tamatamailima. O loo ola pea.

Na ia fuli ia te ia ma faamatala ona laumata, sa tautau fa’aafa. O uga o ona mata na lautetele ma e le’i tali mai i le malamalama.

Na toe tu i luga ma autilo solo i le potu.

O le a le mea ua tupu?

7 Setema, 2.17 taeao.

Na faanatinati ifo Penita i lalo i le potutele. Na te le’i manao i nisi faalavelave, ae na ia maua lava.

O le fale faatonu sa loka atoa ina ua uma le osofaiga. Ma e pei ona sa ia masalomia, o le uma ai o le maliu susunu o Mapeletope, na mou ese ai le toaitiiti na totoe pei ni aitu i le pogisa.

Na teufatu e Penita na te sailia uma i latou, faatasi ai ma a’a ma lālā uma, sa latou tuuina atu ia Mapeletope, o faamatalaga ma puna’oa faafitafita e faatino ai lenei osofaiga.

Ae mo le taimi nei, e tataua ia Penita ona toe faatulaga lelei ma faamaopoopo iinei.

Sa i ai lana vaega auivi ua toe aumai i totonu. O i latou sa manunu’a ua ave i falema’i. O i latou na maliliu ua taatitia ai lava i le mea na feoti ai. Na te le’i mana’o e lote se mea se’i vagana ua taunuu mai lana ia lava vaega su’esu’e faapitoa.

O se asiasiga faatiute uiga ese sa fai iinei i le afiafi. E ui ina sa totogi e Penita le au faamamā ‘ea ma fufulu ese le manogi, ae sa le’i mafai ona aveese ai le manogi o tino susunu.

Ma o luga atu o le toe faatulaga lelei o le nofoaga lenei, na ia talia ai le tele o valaau mai lālā eseese o le vaegaau: e le gata i le faalavelave na tupu iinei, ae faapea foi i le gaioiga e le au faatupu faalavelave i Kerenopili sa le’i taunuu. Na ia gūgū ai i le tele o fesili ma tala. Sa le’i i ai sona taimi faamaumau e talanoa ai pe auai i se taaloga faapolokiki e saili poo ai e sili a o ai na malo.

Na pau le valaau na ia talia ma le fiasia o le faafetai mai le peresetene. Na fa’aaoga e Penita le valaau faafetai lena e alofia ai isi valaau ma fesili uma.

O loo i ai le isi faalavelave o loo lapata’i mai.

O le faamuamua lena.

Ma a o fesootai le faafitauli lata mai i lona mataupu, na ia tuu i ai lona manatu atoa i le taimi nei.

Na ia taunuu atu i le fogafale faafoma'i, ona ia kolosi atu lea i se tasi o potu tumaoti. Na ia ulufale atu ma maua ai Kati ma Lisa o la'ua nonofo i itu o se moega. O Sasa o loo taoto ai i luga a o feliiua'i e Sasa uaea e siaki ai le fatu o faapipii i le ulu o le tamaititi.

"Ua toe ma'i foi?" na fesili ai Penita.

"O se mea fou," na tali ai Lisa. "E lē o fiva pei ona sa i ai muamua."

Sa tu Kati ma piilima. O laina o le popole sa iloa atu i lona muaulu. "Sa ou faitau atu i ai, taumafai e faamoe i le uma ai o mea na tutupu. Sa faalogologo mai. Ona faafuase'i lea ona nofo mai i luga, na faliu atu lea i se tulimanu tuufua o le potu, valaau atu i le igoa Piota, ona galemu lea ma matapogia."

"Piota? O e mautinoa?"

Na lue lona ulu. "Na ta'ua e Iuri o Sasa e i ai lona tuagane masaga e igoa ia Piota. Atonu pe o sana miti poo se tau manunatuga."

A o latou talanoa, na solomuli atu Lisa i se faaputuga o meafaigaluega ma amata ona faaola. O Sasa sa faapipii ai uaea e siaki ai le fatu, faapea foi le vaaiga o ona neura ma faalogona.

"O ola ana masini?" na fesili ai Penita, o geno atu i le vaega o tiute ia Sasa.

"E leai," na tali ai Lisa. "Na siaki e Malakoma. Na sau, a ua toe alu. Alu e fai ana telefoni. Ae mautinoa o i ai se mea o tupu. O faitauga o ana masini o loo iloa ai le oso maua luga o ona faalogona mai le mea masani. E patino i lona itu taumatau, o loo i ai lona totoga faapipii. E toetoe lava ina e pei o loo mamau ona faalogona. E tuufaafegai ma le maua lalo o fua o lona fatu ma lona toto. E pei lava o loo fafaga tasi e punaoa o lona tino le totoga e tasi."

"O lona fai'ai," na fai atu ai Penita.

"Lena tonu lava. O isi mea uma ua tapunia."

"A e mo le a le faamoemoe?"

Na lūlū le ulu o Lisa. "Ou te matuā lē iloa. O le a toe fai nisi a'u siaki, ae afai e lē tali mai o ia, e tasi le faai'uga ou te mafaufau i ai."

"O le a lena?" na fesili atu ai Kati.

"E ui ina e le o ola le totoga faapipii, o isi neura sipaika maua luga o loo ogatotonu uma i ona autafa. Ou te talitonu o neura eletise na o loo tofua sao uma i le mea o loo tupu ia te ia. O ona taualumaga faaeletise o loo maua luga tauaafefe i le itu lena – e peiseai o uaea i lona faiai o loo gaiioi pei ni laau uila. Afai e lē mafai ona ou faafilemu ana gaiioiga faaneura, e iu ina mu uma ona totoga."

Na sesega Kati i lana faatulagaga. "Na e ta'ua se faaiuga."

O Lisa na mapuea, sa le'i fiafia. "E i'u ina manaomia lo tatou aveese o lona totoga faapipii. O le mea lena na alu i ai Malakoma. E valaau i se foma neura i Siasia Uosigitone."

Na laa atu Penita ma opo lona lima taamilo i le tauau o Kati. Na ia iloa le piitaga ua i ai le tamaitai ma le tamaititi. Ua toatele i latou ua maliliu i le puipuiga o ia. Pe afai e leiloa atu o ia...

"O le a matou faia le mea e sili matou te mafaia," na folafola atu e Penita.

Na lue le ulu o Kati.

Na tatagi le faailoilo o le telefoni a Penita mai lona fusipa'u. Na faamamulu faasaoloto lona lima e siaki le numera. O le amapasa o Rusia. O le valaau e tataua ona tali. Ua tataua ona taunuu Karai i Keleniapisiki i le isi minute pe lua.

A o ia tepa atu i tua, na talo ese atu Lisa ia te ia ma se ataata lēlavā. "Ou te valaau atu pe a i ai se isi suiga."

Na ia aga'i atu i le faitotoa – ona faafuase'i lea ona ia toe manatua, e i ai se mea na ia tuu ese seia i ai se taimi, a e le'i faailoaina lava. Na ia vaai faafesili ona foliga ia Kati.

"O tua atu teisi," na ia fai atu ai, "ou te lē iloa pe sa'ou la'u faalogo ia te oe."

Na pupula atu Kati ia te ia.

"O le ā le uiga o lau tala na fai mai, o loo ola pea Monike?"

12.20 afiafi

Atumauga Urale i Saute

Na savali faalafilafi atu Monike i autafa o le nofoaafi i le pogisa pato'i. Na faasolosolo atu lona ogalima sa faalavelavea i taavale a o ia agai atu i le auala. Na fālō ma tagotago atu ona lima i ona luma. Sa lavelavea solo ona vae i sooga o auala ma maa lapopo'a, a o ia faasolosolo atu mai le pito i luma agai i tua.

O sina taimi puupuu i tua atu, a o laa ese Monike mai le nofoaafi, na uma ai le 'e'ē o Piota. Na motusia fafua'e'i. Na atili ona leaga le sālō, na faatupu ai se filemu e atoatoa pei o le pogisa.

Na tata vale le fatu o Monike.

Na taunuu atu o ia i le isi taavale oa, ona oso atu lea i lona pito ma talo atu lona lima i le gaogao.

"Piota?"

(sosoo atu Sulu Samoa Oketopa 2025)

Pepa Mafutaga Faafouina (mai itulau 7)

11:3, “a o le ulu o Keriso o le Atua lea.”) e faailoa ai, o le avea o Keriso ma Ao o le Ekalesia, e mai le Atua. O lona uiga, o le faataua faamataupu silisili i le silasila a le aposetolo o Paulo i le pulou o Tamaitai, e faavae lava i le Talalelei ia Iesu Keriso. Ile foafoaina e le Atua o le tagata, na avea ai Atamu ma ulu o le aiga. O le avea o Atamu ma ulu o lo la aiga ma Eva, i le foafoaga mamana a le Atua, o le avea lava lena o le faatinoga o le tiute faa-le-ulu-o-le-aiga o Atamu, e fai ma viiga o le Atua. O le foafoaina o Eva, ina ia avea ma fesoasoani o Atamu, ona e lē mafaia ona faia toatasia e Atamu, le galuega faa-tausimea o le Fofoaga. O le avea la o Eva ma fesoasoani o Atamu, e avea ai e Eva ia lana tane, o le ulu o le la aiga, ma e tatau ai ona ia amanaia ma aloaia lana tane. I le auai la o le tane ma lana avā, i tapuaiga i le Atua, e tatau ai i le tane ma le avā, ona ave viiga uma mo le Atua. O le ala lea ua ufiufi ai le ao o le tamaitai, i le pulou, se i faailoa ai, o lona soifua ofoina mo le Atua, i so o se mea lava o lenei ola, e ave uma lava mo le Atua. O ona tulaga i le va ma lana tane, ua ufiufi ae ofoina uma le loto ma le agaga, ina ia moni le viiga ma le tapuaiga i le Atua. Ua tatau ai le faamamafa a le Ekalesia Faapotopotoga Kerisiano Samoa, i le faia o pulou o tamaitai, ua fa’aaofia e avea ma tagata auai o le Ekalesia ma ua inu i le Faamanatuga.

O le Mataupu Silisili o le faatauaina o le lē faaliuefuefuina o tino maliliu i le Ekalesia etc...

Mai le tino atoa o le tagata maliu, o ona ivi, e lē pala pe a tanumia. E iu lava i le pala, ae faitau fia miliona tausaga faatoa oo i ai se pala. O lona uiga, o le finagalo lena o le Atua, na ia faia ai le tagata ma ona ivi, i le faamoemoe etuai onapala ivi. O le eseeseega o ivi ua tanu ma ivi e faaliuefuefu, o ivi ua tanu, e mafai ona fa’aaoga e le au suesue e saili ai le faasinomaga o tagata ua maliliu (DNA). O le eseeseega tele lea o le tanumia ma le faaliuefuefu. Ua faavave e le masini faaliuefuefu le pala o le ponaivi, mai le faitau miliona o tausaga i lena o le 30 minute pe itula. Tasi lea o lape i le faaliuefuefuina o tino maliu. Ae o le a faamatalani vaaiga mai le Tusi Paia, e faavae ai le talitonuga faamataupu silisili o le EFKS, i le lē tatau ai ona faaliuefuefu, tino maliu o ona tagata lotu. E lē o fa’aaogaina e le gagana o le Tusi Paia le upu faaliu efuefu (cremate). O lona uiga, e leai se faatinoga faapea e faia pe a maliliu ni tagata.

O le tanumia o tino maliu, o se faiga masani i le tele o tala o le Tusi Paia. E tanu lelei i le palapala; fai lelei tuugamau (tomb) pe teu i totonu o loa tetele (vault). O nai faataitaiga: o Sara le tagata muamua na tanumia i le tuugamau (Ken 23:3-18);¹⁹ sosoo ai ma augatamā o Isaraelu – Aperamo (Ken 25:9), Isaako ma Repeka (35:29), Iakopo ma Lea (50:13); ma le anoanoai o isi.²⁰ O Arona le uluai ositaulaga sili sa tanumia lelei lona tino maliu i Mosera (Teu 10:6); o Mose na tanu i le fanua o Moapi (Teu 34:5-8). E oo lava i perofeta e pei o Samuelu (1 Sam 25:1) ma tupu pei o Tavita (1 Tup 2:10). O le mau e faasino i le tanuga o Mose (Teu 34:6), e mafai foi ona faaliliu, na tanu Mose e le Atua. O se faaliliuga e atagia ai, e oo lava i le Atua, e finagalo e tanu ona tagata.

O le susunuina o tino maliu – e masani ona faia o ni faasalaga (judgement) ma se auala sa faalumaina ai tagata; o se faailoga o le le amanaia. Faataitaiga o Saulo ma ona atalii, sa susunuina e tagata Iapese Kiliata (1 Sam 31:11-12);²² Sotoma ma Komoro (Ken 19:24); Natapu ma Aviu (Lev 10:1-2); o e na faitio ia Mose (Num 11:1-3).

Mai le Feagaiga Fou, i le molimau a Ioane, o le maliu o Iesu Keriso, e taunuu ai perofetaga: “*Aua ua faia ia mea ia taunuu ai le Tusi, E le gauia sona ivi.*” O le mafuaaga lea na alu ai Iosefa Arimataia ma faanoi le tino maliu o Iesu ia Pilato. Ina ia taoto lelei lona tino maliu i se tuugamau, tapenaina lelei, ona e taua tele le tagata i le Atua, aemaise o lona Alo Pele o Iesu Keriso.

E mafuli le gagana o le Tusi Paia i le tanu o tino maliu. O le fa’aaogaina o le afi e susunuina ai tino o tagata, o ni ata o le faamasinoga (judgement) ma faasalaga o e ua solitulafono.

Mataupu Silisili o le Satauro Avanoa:

Ia’oa’oga o mataupu silisili faa-le-agaga a le EFKS, e faataua ai le satauro ua avanoa, o se tasi o ogatotonugalemu o ana a’oa’oga faaKerisiano. O le satauro na faasatauro ai Iesu Keriso e faailoa ai le maliu o Keriso, o se taulaga ofoina, o le alofa tunoa lava lea o le Atua, mo le faamagaloina o le tagata agasala. O le avea o lea satauro ma satauro ua avanoa, e faailoa mai ai i le tagata faatuatua, le Keriso manumalo, ua toe tu mai i le oti ma le tuugamau. E faamanatu mai ai, o le toe tu o Keriso, o le malosiaga sili mai le Atua ua aumai ai le ola fou, e ala mai ia Keriso, mo tagata uma. Roma 6:5 & 9 “*Aua afai ua faatasia i tatou i le faatusa i lona maliu, e faapea foi i tatou i lona toe tu mai... Ua*

tatou iloa ua toe tu mai Keriso nai e ua oti, e le toe maliu lava o ia, e le toe pule le oti ia te ia.” Ua onomea ma tatau le faataua o le satauro ua avanoa. O le faailoa mai lea o le avanoa o le ola fou, ua maua e tagata uma e salamo, talitonu, ma faatuatua, i le Atua.

Mataupu Silisili o le Faamanatuga:

O le Faamanatuga i le Ekalesia Faapotopotoga Kerisiano Samoa, e faamanatu mai le alofa tunoa o le Atua e ala ia Iesu Keriso. Fetalai Iesu: “...*tou te faia le mea nei ma faamanatuga ia te a’u.*” I le vaai faamataupu silisili o le EFKS, i le ‘Aiga o le Paseka’, o le faamanatuga o le maliu ma le toe tu manumalo o Iesu Keriso. O isi talitonuga faa-le-tapuaiga e pei o le Katoliko Roma, e faataua le ‘Aiga o le Paseka’, o le auai moni mai lava lea o Keriso i le tino. Peitai, i le lagona o le Ekalesia Faapotopotoga, e le tusa i tatou ma le mamalu o le Atua Silisili ese e ala ia Keriso. O ai ea le tagata faatauavaa, o le a papa’i ai i le mamalu o le tino o Keriso? O le ala lea, ua faataua ai le avea o le ‘Aiga o le Paseka’ ma sauniga e faamanatu ai le alofa tunoa o le Atua e ala i lona Alo Pele, ina ia manatua ma teu pea i le loto ma le agaga o le tagata faatuatua. 1 Korinito 11:28 “*A ia su’esu’e ifo le tagata ia te ia, i le ‘ai ai o ia i lenei areto, ma inu i lenei ipu.*”

AULOTU KOLISI FAAFAIFEAU MALUA **A’OGAAU-SAILI**

1. O le a le Ekalesia?

O le Ekalesia o le faapotopotoga o tagata ua alolofa i le Atua, ma usiusitai ia te Ia. Ua latou fesootai foi le tasi i le tasi i le fealofani ma le felagolagoma’i.

2. O ai sa faavaeina le Ekalesia?

O Iesu Keriso lo tatou Alii.

3. Pe faapefea ona tatou iloa ua tatau ona auai faatasi tamaiti i le Ekalesia?

Aua o le Ekalesia o le faapotopotoga o tagata uma ua alolofa i le Atua, e aofia ai ma fanau. Sa fetalai foi Iesu, “*Ina tuu maia o tamaiti e o mai ia te a’u, a e ‘aia le vavao ia te i latou, aua e faapei o i latou nei o e o i le Malo o le Atua.*”

4. O a ni mea taua ua maua mai i le Ekalesia?

Ua maua ai le iloa atili o le Atua, e ala i le faitau ma le faalogi o lana Tusi Paia. Ua a’oa’oina foi i latou

uma o i lenei mafutaga paia ma Iesu i le taua o le tatalo, o le ola faitaulaga ma le tapua’i i le Atua i le agaga ma le faamaoni.

5. O le a le uiga o le sauniga paia?

O sauniga paia e aoga mo le agaga. Ua fa’aaogaina mea ua vaaia e avea ma faatusa o mea le vaaia, o mea faaleagaga.

6. O a sauniga i le Feagaiga Fou?

O le Papatisoga ma le Fa’amanatuga.

7. O le a le Papatisoga?

O le sauniga paia e fa’amaufaaailoga ai le sosoo faatasi o le fanau ua papatisoina ma Keriso i lana Ekalesia. A o le faailoga foi o le fanaufouina ma le sosoo faatasi o le fanau, ma latou uma ua i ai i le Ekalesia.

8. O le a le amio e ao ona faia e i latou sa papatisoina?

E ao ina a’oa’oina lelei tamaiti ua papatisoina e o latou matua ma matua fai, ma faifeau i mea fa’aleagaga. A o’o ina matutua e i ai le faamoemoe o le a latou foai o latou loto ma o latou agaga ia auauna i le Atua.

9. O le a le faamanatuga?

I lenei Sauniga Paia aupito paia ua tatou talia ai le areto ma le uaina, o fa’atusa o le tino o Iesu Keriso sa momomo, ma lona toto sa fa’amaligiina i luga o le satauro, mo le fa’amagaloina o agasala a le lalolagi.

10. O le a le uiga moni o le Fa’amanatuga?

(i) Ua tatou fa’amanatuina pea le maliu o le Ali’i se ia toe afio mai.

(ii) Ua tatou molimau ua soifua Keriso, lo tatou Fa’aola.

(iii) Ua avea le fa’amanatuga ma ala e fesootai ai ma Keriso. O i latou uma i le lalolagi ua auauna ia te Ia, atoa ma e ua muamua atu i le lagi.

11. O anafea na faatuina ai le sauniga o le Fa’amanatuga?

Sa fa’atuina lenei Sauniga Paia i le taimi o le toe talisuaga a Iesu ma ona soo i le afeafea aupitoaluga a o lei maliu o Ia.

12. O ai na valaauina e Iesu i le Fa'amanatuga?

O i latou uma ua salamo ona o agasala, ma fa'atuatua ia Iesu i le agaga ma le faamaoni.

13. Tagata ua ekalesia. O ai lea tagata?

(i) *O le Kerisiano*

O le Kerisiano, o le tagata ua mulimuli ia Iesu

(ii) *Tagata ua papatisoina*

(iii) *Ua malamalama lelei i talitonuga fa'avae faa-Kerisiano o le EFKS e pei o nisi talitonuga ua ta'ua i lalo.*

Tolu Tasi Paia:

Le Atua le Tama, le Alo, ma le Agaga Paia.

O ai le Atua le Tama?

O le Pule Aoao, o le Foafoa (Kenese 1 & Ioane 1)

O le Atua e i ai i mea uma.

Foafoaina o le tagata: "Ua faia le tagata e ia, ia foliga i le Atua."

O lona uiga ia foliga le tagata i le Atua i lana amio, ia lelei i le itu faa-le-agaga

O ai le Alo o le Atua?

Iesu Keriso le Alo o le Atua, o le Mesia le Faaola/
Jesus the Messiah, the Son of God is the Saviour
(Mataio, Ioane)

O ai le Agaga Paia?

O le Agaga Paia o le Atua ua lagona i o tatou loto
(Mataio, Galuega)

O le a le faatinoga o le 'Avea ma Soo' (Mataio)

Mulimuli ia Iesu ma o atu e fai nuu uma lava ma soo.

Nisi A'oa'oga Faa-Kerisiano**i. O le a le Agasala?**

O le agasala o le lē usitai lea i le Atua i so'o se mea leaga, e va ai le tagata ma le Atua. O le agasala ua faaleagaina le tagata. Peitai, e alofaina lava e le Atua le tagata agasala e ala i le taumafai e taitaina ia amio lelei. O le alofaina lava lea e le Atua o le tagata agasala i lona alofa tunoa.

ii. O le a le faamatalaina o le 'Alofa Tunoa o le Atua?'

O le alofa e le faatusaina o le Atua e mo tagata uma.

iii. O le a le uiga o le Faaolataga?

O le faamagaloina o agasala o le alofa moni o le Atua, o le faamalosiga o agaga ina ia mafai ona auauna i le Atua ma le olioli.

iv. Pe faapefea ona faaolaina le lalolagi e Iesu?

Sa liutino tagata lo tatou Alii, o Iesu Keriso. Sa maliu i luga o le Satauro, sa toe tu mai i le aso tolu, sa afio a'e i le lagi, ona auina mai lea o le Agaga Paia.

v. O le a le Salamo? O le salamo o le faanoanoa loloto po o le lagonaina o le faatauvaa e le tagata agasala, o le talitonu i le Atua na te faamagaloina agasala, ma ia faalagolago i le Agaga Paia e foa'i le malosi fou ina ia mafai ona auauna ma le faamaoni.

vi. O le a le uiga o le faatuatua atoa ia Iesu?

A tatou talitonu ia Iesu, o le faatuatua atoatoa ia te Ia ma foai o tatou olaga na te pule ai.

vii. Pe faapefea ona salamo ma talitonu ia Iesu?

Ua mafai ona salamo ma talitonu ia Iesu ona o le fesoasoani mai o le Agaga Paia

viii. O le a le manuia ua maua ina ua faatuatua ia Iesu?

Ua faamagaloina agasala, ua maua le loto fou ma le agaga ua naunau i le fia auauna ia Iesu.

ix. O le a le tatalo?

O le tapua'i atu i le Atua e ala i le faafetai ona o meaalofoa ua talia, o le ta'uta'u o agasala, o le faaali atu o mana'o o le loto ma le agaga.

x. O faafofoga le Atua ia tatou talosaga ma tali i ai?

Ioe, ua faafofoga le Atua ia te i tatou, ma ua tali mai e tusa ma lona finagalo.

xi. Faitau le Tusi Paia

Aisea ua ta'ua ai le tusi lenei o le Tusi Paia?

Aua o mataupu uma ua i ai sa tusia e tagata ua osofia i le Agaga Paia. O lea, ua mafai ona faamatala le uiga o le Atua ma lona naunauta'i i loto o tagata.

E fia vaega tetele ua i ai i le Tusi Paia?

E lua – O le Feagaiga Tuai ma le Feagaiga Fou

O a aoaoga ua maua mai i le Feagaiga Tuai?

Ua tatou iloa ua faaaogaina e tagata Eperu e le Atua, ina ia taitaiina loto ma agaga ia tapua'i ia te Ia. E le gata i lea, a ua saunia le lalolagi mo le afio mai o Iesu Keriso.

Pe faapefea ona faitau le Tusi Paia?

E ao ina faitau le Tusi Paia ma le ava i le Atua. E ao ina saili le fesoasoani mai o le Agaga Paia, ina ia manino atili le finagalo o le Atua mo i tatou.

xii. Aisea ua tatou faapaiaina ai ma faataua le ulua'i aso o le vaiaso, o le Aso Sa o le aso faapitoa tatou te tapua'i ai i le Atua?

Ua faapaiaina le ulua'i aso ma Aso Sa, aua sa toetu mai ai Iesu mai le tuugamau i lea lava aso. Sa faaali lona tino i le au-soo i lea lava aso. Talu ai ua tatou masani ona fa'aaogaina le uluai aso o le vaiaso e tapuai ai i lona Suafa Paia.

xiii. O a mea e tataua ona fai i le Aso Sa?

E tataua ina tatou mapu ane mai i galuega ua masani ai i aso fai so'o, vagana galuega alofa ua tataua mo nisi. E ao ina tia'i fiafiaga faaletino, a e faasaga i mea faaleagaga. O le tapuaiga i le Atua, o le faitauina o le Tusi Paia ma soo se mafauauga lelei e viia ai le Atua.

UPU FAAIU

O le faamoemoe o lenei faasoa, ina ia aoao manogi, mo le toe tuufaatasia ma faalatele le faamatalaina o Mataupu Silisili Faavae Faa-le-Agaga o le Ekalesia. O se tusitusiga e taua tele, ina ia o faatasi ma le Faavae o le Ekalesia ma Iugafono Tumau o le Ekalesia.

E taua tele lo outou sao, e mafai ona fesootai mai, ma faailoa mai ina ia lelei atili le faalateleina o lenei faamoemoe, ma ia faatumauina ai pea le manino o le faamatalaina o Mataupu Silisili Faavae Faaleagaga o le Ekalesia Faapotopotoga Kerisiano Samoa mo tupulaga fai mai o le lumanai. Faamagalo se gagana ua sala.

Manuia tele le Mafutaga.

Ma le ava tele,

(Saunia susuga Professor Vaitusi Nofaiga FS,
(Pule Kolisi Faafaifeau Malua.)
(20 Aokuso 2025).

O AU AFIOGA O LE SULU...

TA'UTINO ou SESE

“¹⁶O le mea lea ia feta'uta'ua'i a outou agasala, ma tatalo le tasi mo le tasi, ina ia faamaloloina outou.” Iako.5

Tatou te faia uma ni mea sesē, e lapelapea a tatou faai'uga fai, ma e i ai lava se taimi o le soifuaga tatou te fetaia'i ai ma faaletonu ona o tatou vaivaiga. Ioe, o tatou uma o tagata, na faia i le efuefu ma le palapala e lē atoatoa, e i ai lava se taimi tatou te sesē ma agasala ai. E potu lava le tautai, a e i ai le aso e 'asa ai lona faiva. O le upu moni, o sesē o nisi ia o auala e sili ona lelei ma malosi, e a'oa'oina ai i tatou ina ia popoto. Peitai ona o lo tatou fefefe ina ne'i ta'uleagaina i tatou, pe faitaulia ma inosia e tagata, o le ala lea tatou te natia ma ufiufi ai a tatou mea sesē – o sasi e le'i fuafuaina, ma lape na fai ma le mautinoa. Na pau lava le mea leaga e maua mai i mea sesē, pe afai e leai se a'oa'oga lelei e maua mai ai. O le musu e faailoa sesē, e punitia ai auala e tuputupu a'e ai le ola faatuatua ma faalelei atili. O le fetalaiga a le Atua i lona nuu, i lona otegia o i latou ina ia a'oa'oina mai a latou mea sesē, *“⁴Ia e fai atu foi ia te i latou, O loo faapea ona fetalai mai o le Alii, Latou te pa'u'u ea, a e le toe tutu mai? E liliu ese ea o ia, a e le toe liliu mai?” Iere. 8.* O se toomaga mo oe a e o se faaosofiaga mo nisi, pe afai e mafai ona e faailoa atu ou sesē aunoa ma le faaleagaina pe faavaivaia e ia mea.

Atonu o ni mea e tutupu, ma isi tagata na latou faaseseina a tatou faaiuga, peitai i le i'uga, o i tatou lava e amoina le tuatuagia o mea tatou te fai. Pe afai tatou te faia mea sesē, o gaioiga tatou te fai – o la tatou filifiliga. O le auala e sili ona lelei e faafetaia'i ai ma o tatou sesē, o lo tatou talia atoatoa o tuatuagia ma aafiaga mulimuli mai, e a'oa'oina mai ai, e filifili pe faapefea ona 'aia le toe faia faalua, ma faagasolo pea i luma le soifuaga. O le mea lelei o le a maitauina, e i ai nisi tagata o le a latou fesootai atili ma oe, latou te fa'aaloalogia ma amanaia oe, pe afai e te mafai ona tautino atu lou sesē. Ma o le a faasaolotoina foi i latou, ina ia latou mafai ai ona faia foi faapea. O le faamaulalo o se tasi o uiga e aloaia lelei ma fa'aaloalogia maua e nisi tagata i isi foi tagata; o le faamaulalo ma loto fefete e itagia ma inosia e tagata – e oo lava i isi tagata faamaulalo. **ET.**

O NISI NA MOLIMAUINA LE ASO NAI PETANIA FOU



Le aufaigaluega Matagaluega Faleata ma nisi o le Ekalesia



**Afioga i le Matuaofaiva Tuifaasisina Taito, le
Tusiata Rev Kolia Kolia, & Vaituu Palale FS**



Nisi o le mamalu faalemalu sa auai



Susuga Toeaina Pulega Faleata Sisifo ma isi



Susuga Tafa'i Galumalemana FT & isi